



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno MCCCXVI. ad annum MCCCCXXIII.

Parisiis, 1644

Epistola II. Urbani Papae VI. Ad Vniversitatem Parisienem. Monet eos vt pergant sui electionem contra schismaticos eorumque fautores defendere.

urn:nbn:de:hbz:466:1-15653

rius nominatis iuramento, obligatione, promissione, vel quacumque firmitate vallato antea fuissent astricti: alias etiam pœnas eisdem damnatis infligimus, & a iure inflictas decreuimus in suo robore duraturas. *Et infra.* Datum Romæ apud sanctam Mariam trans Tiberim VIII. Idus Nouembris, pontificatus nostri anno primo.

EPISTOLA II.

VRBANI PAPÆ VI.

AD VNIVERSITATEM PARIENSEM.

Monet eos vt pergant sui electionem contra schismaticos eorumque fautores defendere.

Urbanus episcopus seruus seruorum Dei, dilectis filiis, rectoribus, magistris, doctoribus, scholaribus ac vniuersitati studii Parisiensis, salutem & apostolicam benedictionem.

INTER, imo super ceteras studentium vniuersitates, in quibus scientiarum gemma resplendet, vestra Parisiensis velut quoddam sidus radiat, & pulsus ignorantia ac erroris tenebris, doctrina suæ lumine circumlucet. Ex ipsa nempe velut ex quodam purissimo fonte, semper sani dogmatis riuuli profluxerunt, qui per innumeros alueos pronius discurrentes, falsarum opinionum lumen absterferunt: huiusmodi quidem fontis claritatem nulla vnquam quantumuis impetuosa vis pluuiæ turbidauit. Vos itaque dilectissimi filii, qui ex hoc limpidissimo fonte dulcissimas literas auido haustu elicitis, congaudemus vobis, & sanctæ Romanæ congratulamur ecclesiæ, cui talia ligna fructus producentia dulcissimos secus decursus aquarum in tam ingenuo viridario summus parens rex plantauit: cui diu congaudemus, & exultat spiritus noster, quando intra felicia castra studii Parisiensis tot doctissimos ac magnanimos veritatis & orthodoxæ fidei pugiles intuemur. Gemat hæreticorum prauitas quantum potest, & euacuet contra tam munitissima castra pharetras suas turba schismatica. Nam sunt milites alumni nostri ad resistendum promptissimi, veritatis & fidei thorace muniti, habentes bicipitia spicula, quibus hostium corda penetrentur: habent & faces ardentissimas caritatis, quibus illorum ma-

china confundantur: habent & scaturientis fontis vndas, quibus eorum facula protinus extinguantur; vt nec illud prætereamus, cuius sola recordatione plurimum consolamur, quodque nuper cum ingenti gaudio fide dignorum relatione percepimus, quemadmodum vos aduersus eorundem hæreticorum atque schismaticorum assertionem subdolam contra nos impudice loquentium, nonnullas sanctas, veras & saluberrimas, & quales professionem vestram decet, in nostrum, imo memoratæ fidei fauorem, & veritatis defensionem, sententias publice tenuistis, & contra quoscumque contrarium profitentes defenfastis: pro quibus vniuersitatem vestram iteratis in Domino laudibus prosequentes, deuotionem vestram requirimus & hortamur attentius, ac per asperionem sanguinis Iesu Christi, cuius in hac parte res agitur, obsecramus, quatenus causam iustitiamque nostram toti mundo notoriam, quam dicti pseudochristiani, veri satellites antichristi, obnubilant, ac schisma perniciosissimum in Dei ecclesia suscitare moliantur, suscipere, imo iam susceptam velitis defendere tamquam legitimi certatores; & ne inconsutilis veri Ioseph tunica lanietur, sub diuinæ potentia dexteræ vos murum inexpugnabilem opponatis, hostiumque multitudinem nullatenus formidatis, sub signis militantes victricibus veritatis, quæ licet quandoque calumniantium fuscatis argumentorum coloribus impugnetur, vinci tamen non potest, & illorum nequit multitudine conculcari. Nihil enim facilius, quam pro veritate bellare: nulli clariores triumphus, nulla pinguiora spolia reportantur, quam quæ veritas defensa pollicetur. Eia ergo athletæ magnanimi & veritatis orthodoxæ fidei deuotissimi defensores, contra illorum impugnatores & hostes feliciter insurgatis, vt proinde præter æternæ mercedis præmia, humanarumque laudum præconia, nostram & apostolicæ sedis benedictionem & gratiam ac exauditionem in vestris petitionibus tamquam bene meriti reportetis. Datum Romæ apud sanctam Mariam trans Tiberim xi. Kalendas Decembris, pontificatus nostri anno primo.

Concil. Tom. 29.

T ij